

REES, THOMAS MARDY (1871 - 1953), gweinidog (A), hanesydd a llenor

Enw: Thomas Mardy Rees
Dyddiad geni: 1871
Dyddiad marw: 1953
Priod: Margaret Rees (née Williams)
Plentyn: Bryn Rees
Plentyn: Penry Rees
Plentyn: Kenneth Rees
Plentyn: Alyn Rees
Rhiant: Mary Rees
Rhiant: William Rees
Rhyw: Gwryw
Galwedigaeth: gweinidog (A), hanesydd a llenor
Maes gweithgaredd: Crefydd; Hanes a Diwylliant; Llenyddiaeth ac Ysgrifennu
Awdur: Evan David Jones

Ganwyd yn Sgiwen, Morgannwg, yn 1871, yn un o chwe phlentyn William Rees, glôwr, a'i wraig Mary. Aeth i ysgol genedlaethol y pentre ac o'r ysgol i weithio gyda'i dad yng nglofa'r Fforest Fforchdwm. Yna buont yn gweithio yn lefel Melin-cwrt wedi symud i Resolfen. Pan gaeodd y lefel symudasant i'r Maerdy yn y Rhondda Fach. Yr oedd y tad a dau o'r bechgyn, Thomas a John, yn gweithio ym mhwl Rhif 2 ar 23 Rhagfyr 1885 pryd y cafwyd tanchwa drychinebus yn y pwll, ond achubwyd y tri.

Dechreuodd Thomas ar ei yrfa gyhoeddus yn ieuanc fel adroddwr, areithiwr, bardd a thraethodwr. Dechreuodd bregethu pan oedd yn 18 oed a hynny ar gais eglwys Siloa, Maerdy. Aeth am dri mis i ysgol uwchradd Pentre Rhondda cyn mynd i Ysgol y Gwynfryn, Rhydaman. Enillodd ysgoloriaeth leol i fechgyn o'r Maerdy i Goleg y Brifysgol yng Nghaerdydd. Derbyniwyd ef drwy arholiad i'r Coleg Coffa yn Aberhonddu.

Ordeiniwyd ef ym Mehefin 1896 ym Methel Newydd, Mynyddislwyn, Mynwy. Yno drwy olrhain hanes yr eglwys y dechreuodd gymryd at ymchwil hanesyddol a fu'n un o brif ddiddordebau ei fywyd. Yn 1899 symudodd i fugeilio eglwys (S) Bwcle, Sir y Fflint ac yno cafodd gyfle i fanteisio ar adnoddau Llyfrgell Sant Deiniol ym Mhenarlâg. Cymerodd ran amlwg mewn llywodraeth leol fel aelod o gyngor sir a chadeirydd Pwyllgor Addysg sir y Fflint. Yr oedd yn aelod o ddirprwyath a fu ger bron Comisiwn Datgysylltiad a Dadwaddoliad yr Eglwys. Yn 1906 newidiodd ei faes, a chymryd gofal eglwys Markham Square, Chelsea. Yno bu'n cydweithio â'r Arglwydd Monkswell i hyrwyddo buddiannau plant. Dychwelodd i Gymru yn 1912 i gymryd gofal o eglwys (S) Gnoll Road, Castell-nedd ac aros yno nes ymdddeol yn 1946. Ar ei ymdddeoliad gwnaethpwyd ef yn weinidog anrhydeddus i'r eglwys.

Enillodd lawer o wobrwon yn yr Eisteddfod Genedlaethol Ef oedd ysgrifenydd pwyllgor llên Eisteddfod Genedlaethol Castell-nedd yn 1918. Yr oedd yn aelod o Orsedd y Beirdd. Darlithiodd yn helaeth ar faterion hanesyddol. Ar gyfrif hynny a'i ymchwil a'i gyhoeddiadau etholwyd ef yn gymrawd o'r Gymdeithas Frenhinol Hanesyddol (F.R. Hist. S.). Cyhoeddodd nifer o lyfrau a llyfrynau - *Y Lili fach wen a thelynegion eraill* (1903); *Breezes from the Welsh hills and other poems* (1906); *Notable Welshmen* (1908); *Ebenezer Jones, the neglected poet ...* (1909); *Ystoriau difyr ...* (1908 ac 1909); *Mynachdai Cymru ...* (1910); *Welsh painters, engravers, sculptors (1527-1911)* (1912); *Difyrwch gwŷr Morgannwg ...* (1916); *Hiwmor y Cymro ...* (1922); *A history of the Quakers in Wales and their emigration to North America* (1925); a *Seth Joshua and Frank Joshua ...* (1926). Ef oedd golygydd *The Official Guide to Neath* o 1922 i 1941. Cyhoeddodd hefyd bamffledi Cymraeg a Saesneg ar ganlyniadau Deddf Unffurfiaeth, 1662, a byr hanes eglwysi Maes-yr-haf, Castell-nedd, a Bethel Newydd, Mynyddislwyn. Priododd Margaret Williams a fu farw 4 blynedd o'i flaen. Bu iddynt 4 mab ac un ferch. Bu'r hynaf, Alyn, farw o flaen ei dad. Ef oedd ysgrifenydd cyntaf y Cyngor Ymgynghorol ar Addysg Dechnegol yn ne Cymru. Bu Kenneth yn rheolwr banc yn Croydon, Penry yn brifathro ysgol ramadeg Basaleg, a Bryn yn weinidog ar eglwys gynulleidfaol Muswell Hill.

Bu farw 2 Mai 1953 a chladdwyd ef ym mynwent newydd Llanilltud Fach.

Awdur

Evan David Jones, (1903 - 1987)

Ffynonellau

The Congregational Year Book, 1954

Adroddiad Blynyddol Llyfrgell Genedlaethol Cymru, 1979, 5

Darllen Pellach

Erthygl Wicipedia: [Thomas Mardy Rees](#)

Dolenni Ychwanegol

Wikidata: [Q18535890](#)

Dyddiad cyhoeddi: 1997

Hawlfraint Erthygl: <http://rightsstatements.org/page/InC/1.0/>



Jones, E. D., (1997). REES, THOMAS MARDY (1871 - 1953), gweinidog (A), hanesydd a llenor. Y Bywgraffiadur Cymreig. Adferwyd 14 Awst 2024, o <https://bywgraffiadur.cymru/article/c4-REES-MAR-1871>

Y Bywgraffiadur

Preifatrwydd a Chwci
Hawffraint
Y Prosiect
Cymorth
Cysylltu

LGC
NLW

LLYFRGEL
THE NATION



Yn ddiwydian
Llywodraeth Cymru
Supported by
Welsh Government